

# Hanya SOP ketat mampu kekang pandemik

**Seperi** dijangka Perintah Kawalan Pergerakan (PKP) dilanjutkan dua minggu lagi sehingga 18 Februari ini, kecuali bagi Sarawak yang terus kekal dengan PKP Bersyarat (PKPB).

Mahu tidak mahu, kita perlu kembali fokus kepada prosedur operasi standard (SOP) yang sedang berkuat kuasa.

Pada peringkat kritikal ini, hanya SOP lebih ketat mampu mengekang penularan wabak, sekali gus mengurangkan jumlah kes.

Pengalaman pelaksanaan terdahulu sejarnya memberi gambaran menyeluruh mengenai cara terbaik memutuskan rantai penularan COVID-19. Kita sudah ada pengalaman melaksanakan PKP penuh tahun lalu, malah PKP lebih fleksibel dengan pelbagai kelonggaran bagi mengimbangi keperluan krisis kesihatan dan ekonomi juga sudah kita lalui.

Tidak sepatutnya timbul soal kenapa masih ada yang ingkar arahan PKP serta leka mematuhi SOP sehingga kes harian terus naik mendadak.

Jika keadaan berterusan, Malaysia dijangka mencatat 10,000 kes pada minggu kedua bulan depan, yang mana pada

minggu pertama Mac diunjurkan jumlah kes boleh mencapai angka 8,000.

Jadi sudah tiba masanya kita melihat semula SOP yang sedang berkuat kuasa dan mencari punca kes harian terus meningkat mendadak.

Kita perlu akui pelaksanaan PKP lebih fleksibel menyebabkan anggota masyarakat leka dan alpa mematuhi SOP ditetapkan. Rakyat melihat kelonggaran diberi, terutama pengoperasian hampir semua sektor ekonomi dan sosial sebagai lesen besar untuk lebih santai dan tidak terlalu terikat dengan SOP.

Buktinya jelas apabila setiap hari bilangan anggota masyarakat dikompaun kerana ingkar arahan PKP terus meningkat. Bilangan kenderaan di jalan raya, terutama yang sengaja mengambil kesempatan keluar rumah, walaupun tiada urusan penting juga terus meningkat. Di beberapa kawasan umum dan tumpuan orang ramai, kelihatan aktiviti harian berjalan seperti seolah-olah tiada apa perlu dirisaukan mengenai serangan wabak ini.

Kita faham keluh kesah anggota masyarakat yang perlu terus bekerja, berniaga dan mencari rezeki, namun itu

bukan alasan untuk kita leka dan alpa dalam mematuhi SOP ditetapkan.

Penguatkuasaan juga wajar diperhatikan lagi. Mengambil kira situasi anggota masyarakat dan pihak industri yang mula memandang remeh SOP, eloklah pihak berkuasa melipatgandakan penguatkuasaan.

Aktiviti rondaan dan pemantauan berkala serta berterusan wajar diteliti dan terus ditambah baik. Jika pasukan keselamatan menghadapi masalah kekurangan tenaga kerja, apa salah jika dimobilisasi penjawat awam daripada kumpulan skim perkhidmatan lain yang boleh diturunkan kuasa bersama-sama membantu pihak keselamatan.

Pemimpin masyarakat dan komuniti seperti ketua kampung dan pengurus persatuan penduduk juga wajar dibabit sama dalam operasi penguatkuasaan seperti ini.

Kadar kompaun yang ada juga wajar diteliti semula kerana didapati terlalu rendah, terutama kepada pihak industri yang menjadi penyumbang besar kenakan kes melalui kluster tempat kerja.

Diharap pihak Peguam Negara yang sedang menyediakan deraf cadangan

untuk kadar denda lebih tinggi akan menggunakan Ordinan Darurat bagi meningkatkan kadar yang seujarnya dikelaskan atau diasingkan mengikut kategori seperti kompaun terhadap individu dan syarikat serta kompaun kesalahan pertama dan kesalahan berulang.

Hakikatnya, kadar kompaun RM1,000 dikenakan ketika ini belum mampu menggerunkan masyarakat yang degil. Kita boleh rujuk amalan di negara luar yang mengenakan hukuman denda lebih tinggi seperti Singapura, Indonesia dan Korea Selatan.

Kita tidak boleh berkompromi dengan individu dan industri yang terus degil dan melanggar SOP sesuka hati, tanpa mempedulikan kesan kepada orang lain.

Justeru, sebelum semuanya terlambat dan semakin sukar dikawal, elok bertindak segera. Tuntasnya, hanya pelaksanaan SOP ketat mampu mengekang rantai penularan wabak ini.

---

**Noor Mohamad Shakil Hameed,**  
Pusat Strategi dan Perhubungan Korporat  
Universiti Putra Malaysia (UPM)